



«Сйзыл бал» киноыс суред.

Пичи муртлэн бадзым куректонэз

Лариса ДМИТРИЕВА

Алигес «Ижыс киноклуб» учкисез тодматйз Эстониыс выль киноен - Вейко Ыунпуулэн ужъёсын.

Вейко Ыунпуулэн нырысетй фильмез - «Сйзыл бал» - 2007-тй арын кылдйз. Со Европайс бадзым кинофестивальёсын трос данъетъёсты угйз. Та фильм бере вераськон жугйськис выль аспортэм эстон кино сярис. Кинокритикъёс пусйизы: Ыунпуу нырысьсэ возматйз Восточной Европайс адямилэс туссэ - Совето Союз но Европа вискын улйсь муртэз. Кыче меда со?

«Сйзыл баллы» аннотация ивортэ: фильм оген кылён сярис. Соин валче секыт мылкыд кельтыны кулэ кад. Но сое учкыса, жожомоно өвёл, татын огинэ сураскемын бёрдонэн серекъян - улонын кад...

Геройёс уло Таллин карлэн бадзым Ласнамяэ ёросаз. Та ёросын уж өвёл, соин ужаны ветло мукет азе. Ласнамяэос уло совето вакытыс кылем трос этажъем юртъёсын, сослэн патеразы - со-

вето вакытыс вуж мебель, техника но зуч кылын книгаос. Тае огдышем улон соослы кельше: районлэн вань аслыз гинэ тупас чеберлыкес, соин, дыр, огез герой - егит архитектор - кошкыны уг дырты Ласнамяэыс, кышноез сюлворе ке но.

Режиссёр көня ке геройёслэс улэм-вылэмзэс возматэ. Ваньзы соос ас понназы уло, соослы уг тырмы сюлмыс вераськон. Котькудйз утча яратон. Фильмын туж өжыт диалогез, геройёс вакчи верасько, адямилэн сямыз адзиске кыче ке вырсэз пыр.

Кылсярыс, басьтом шоро-куспо арлыдъем писателез. Сое кышноез куштэ. Көня ке улыса, кышно-мурт берытске картэз доры. Малы кошкис но мар муген берытскиз, ма солэн сюлмаз - тодыны уг луы.

Режиссёр возматэ оген кылеменыз сэрен курадзис воргоронэз. Кызы меда возе ассэ эстон пиосмурт? Тани куректонэн но вожпотонэн пачылас герой балканын сылэ, перилаез борды зол-зол кырмыськыса, собере бызъыса пыре комнатае но

кошкыны дасяськис кышноэз өс дорын жокатыны выре.

Тужгес но серемесэз сцена: писатель султэ кышноезлэн укно улаз но лущкемен учкыса сылэ, кызы кузпалыз выль туганэныз чупаське. Соос воргоронэз синйылто. Возытэ усеменыз, писатель бызъыса кошке. Уй клубын юз, муртлэн машинаез ворттылыса, жугжаг возэн контейнере дэмже но умме усе. Куректонэз жалятэк винаен гылья, трос уг вераськы. Кышноез азын ялан юмоке усе кад. Озы ке но кышноез малы ке берен дораз ик лыктэ.

Вейко Ыунпуу мултэс кылъестэк, яратыса возматэ огшоры эстон муртлэс лулпушэ. Тунсыко соиз но: камера синйылтэ Таллинкаса совето вакытыс архитектураэ но. Ваньмыз та аспортэм мылкыд кельтэ - абдран, паймон но чеберлыклы шумпотон. Режиссёрлэс мукет ужъёссэ но учкем потэ: мар меда выльзэ усьтоз?